

全上古三代秦漢三國六朝文

全陳文目錄

武帝

卷一

文帝

卷二

廢帝

宣帝

已上卷

後主

武宣章后

後主沈后

始興王叔陵

已上卷四

周弘正

周弘讓

周弘直

何之元

已上卷五

徐陵

卷六至卷十一

虞荔

虞寄

歐陽頎

江德藻

徐伯陽

姚最

沈君理

沈不害

沈文阿

已上卷十二

沈洙

袁泌

袁樞

顧野王

杜之偉

庾持 已上卷十三

沈炯 卷十四

許亨

張種

張立

蔡景麻

毛喜

宗元饒

顧越

劉師知

蕭沆

謝岐 已上卷十五

張正見

陳暄

傅縡

章華

伏知道

謝貞

褚玠 已上卷十六

陸瓊

陸瑜

沈仲由

盛權

徐君敷

張君祖

庾僧淵

朱世卿

楊輦

已上卷十七

闕名

奏版

釋慧愷

釋慧達

釋曇瑗

釋惠津

智文

闕名

已上卷十八

大凡全陳文六十二人

大凡全陳文十八卷

全陳文卷一

烏程嚴可均校輯

武帝

帝姓陳諱霸先字興國小字法生吳興長城下若里人漢太丘長陳寔之後梁大同中爲廣州中直兵參軍除直閣將軍封新安子授交州司馬領武平太守太清中除振遠將軍高要太守元帝承制授員外散騎常侍持節明威將軍交州刺史改封南野縣伯進信威將軍豫州刺史領豫章內史改封長城縣侯尋授散騎常侍使持節軍師將軍南江州刺史進江州刺史尋授平東將軍東揚州刺史領會稽太守鎮京口進征北大將軍開府儀同三司南徐州刺史承聖末進司空敬帝卽位授侍中大都督中外諸軍事車騎將軍揚南徐二州刺史尋授中書監司徒進爵爲公拜丞相錄尚書事鎮衛大將軍進封義興郡公拜

太傅進位相國總百揆加九錫封陳公尋進爵爲王曰太平元
年十月受禪改元永定在位三年諡曰武皇帝廟號高祖

受禪大赦詔永定元年十月乙亥

五德更運帝王所曰御天三正相因夏殷所曰宰世雖色分辭翰
時異文質揖讓征伐迄用參差而育德振民義歸一揆朕曰寡昧
時屬艱危國步屢屯天維二絕肆勤先后拯厥橫流藉將帥之功
兼猛士之力一匡天下再造黔黎梁氏曰天祿永終麻數攸在遵
與能之典集大命于朕躬顧惟菲德辭不獲亮式從天聰俯協民
心受終文祖升禋上帝繼述百王君臨萬宇若涉川水罔知攸濟
寶業初建皇祚維新思俾惠澤覃被億兆可大赦天下改梁太平
二年爲永定元年賜民爵二級文武二等鰥寡孤獨不能自存者
人穀五斛逋租宿債皆勿復收其有犯鄉里清議贓污淫盜者皆
洗除先注與之更始長徒赦繫特皆原之亡官失爵禁錮奪勞一

依舊典陳書此

曰梁主爲江陰王詔

禮陳杞宋詩詠二客弗臣之重歷代斯敦梁氏欽若人祇憲章在昔濟河沈璧高謝萬邦茅賦所加宜遵舊典其曰江陰郡奉梁主爲江陰王行梁正朔車旗服色一依前準宮館資待務盡優隆

陳書武帝紀下

刪改科令詔 永定元年十月癸未

朕聞唐虞道盛設畫象而不犯夏商德衰雖孥戮其未備洎乎末代綱目滋繁矧屬亂離憲章遺紊朕始膺寶厯思廣政樞外可搜舉良才刪改科令羣僚博議務存平價

隋書刑法志

追贈兄道譚驃騎大將軍太尉封始興郡王詔

永定元年十月癸巳

天倫所感義本因心名器追崇則惟恆典亡兄梁故南兖州刺史長城縣公德範沈邃風度寬厚性與天通淡乎靡測昔彈冠入仕

譽重城華、宣力艱難、遂順洪業、雖時非季漢、勢異桓王、海內挹其風流、生民懷其大德者矣、朕受天明命、爰膺寶祚、言尋永往、興慕增懷、可奉贈太尉公、魏文類聚四十六沈炯太尉始興昭烈王碑永定元年下詔

贈周鐵虎詔、永定元年十月

天地之寶、所貴曰生、形魄之徒、所重唯命、至如捐生立節、效命酬恩、追遠懷昔、信宜加等、散騎常侍嚴威將軍太子左衛率潼州刺史領信義太守池陽縣開國侯鐵虎、器局沈厚、風力勇壯、北討南征、竭忠盡力、摧鋒江夏、致陷凶徒、神氣彌雄、肆言無撓、豈直溫序見害、方其理鬚、靡德臨危、猶能瞋目、忠貞如此、惻愴兼深、可贈侍中護軍將軍青冀二州刺史加封一千戶、并給鼓吹一部、侯如故、

陳書周鐵虎傳

封兄子禧爲臨川王詔、永定元年十一月丙申

東都齊國義乃親賢、西漢城陽事兼功烈、散騎常侍使持節都督

會稽等十郡諸軍事宣毅將軍會稽太守長城縣侯學尚清優神
寓凝正文參禮樂武定祇氛心力謀猷爲家治國擁旄作守拜月
有成辟彼關河功踰蕭寇桂蒲之盜自反耕農篳竹之豪用稟聲
朔朕曰虛寡屬當興運提彼三尺賓于四門王業艱難賴乎此子
宜隆上爵稱是元功可封臨川郡王邑二千戶兄子梁中書侍郎
頊襲封始興王弟子梁中書侍郎曇朗襲封南康王禮秩一同正

王

陳書武
帝紀下

封從子陳擬等詔 永定元年

維城宗子實固有周盤石懿親用隆大漢故會盟則異姓爲後啟
土則非劉勿王所曰糾合枝幹廣樹蕃屏前王懋典列代恆規從
子持節員外散騎常侍明威將軍雍州刺史監南徐州擬持節通
直散騎侍郎貞威將軍北徐州刺史襲從子晃炅從孫假節員外
散騎常侍明威將軍設假節信威將軍北徐州刺史吉陽縣開國

侯誼假節通直散騎侍郎信武將軍祔假節散騎侍郎雄信將軍
青州刺史廣梁太守詳貞威將軍通直散騎侍郎慧紀從孫敬雅
敬泰竝枝城密近劬勞王室立列河山已光利建擬可承修縣開
國侯褒鍾陵縣開國侯晃建城縣開國侯晃上饒縣開國侯諺虔
化縣開國侯誼仍前封祔豫章縣開國侯詳遂興縣開國侯慧紀
宜黃縣開國侯敬雅寧都縣開國侯敬泰平固縣開國侯各邑百

戶陳書陳
擬傳

改官制詔 永定二年正月乙未

夫設官分職因事重輕羽儀車馬隨時隆替晉之五校鳴笳啟途
漢之九卿傳呼竝列虞官夏禮豈曰同科殷樸周文固無恆格朕
膺茲寶麻代是天工畱念官方庶允時褒梁天監中左右驍騎領
朱衣直閣竝給儀從北徐州刺史唱義之初首爲此職亂離歲久
朝典不存後生年少希聞舊則今去左右驍騎宜通文武文官則

用腹心武官則用功臣所給儀從同太子二衛率此外眾官尙書

詳爲條制

陳書武帝紀下

親祠南郊赦詔永定二年正月辛丑

朕受命君臨初移星琯孟陬嘉月備禮泰壇景候昭華人祇允慶
思令億兆咸與惟新且往代祇氛于今猶梗軍機未息徵賦咸繁
事不獲已久知下僕言念黔黎無忘寢食夫罪無輕重已發覺未
發覺在今昧爽日前皆赦除之西寇自王琳已下竝許返迷一無
所問近所募義軍本擬西寇竝宜解遣畱家附業輒訂軍資未送
者竝停元年軍糧逋餘者原其半州郡縣軍戍竝不得輒遣使民
閒務存優養若有侵擾嚴爲法制

陳書武帝紀下

原沈泰部曲妻兒詔永定二年三月甲午

罰不及嗣自古通典罪疑惟輕布在方策沈泰反覆無行遐邇所
知昔有微功仍荷朝寄剖符名郡推轂累藩漢口班師還居方岳

良田有逾于四百，食客不止于三千，富貴顯榮，政當如此，鬼害其盈，天奪之魄，無故猖狂，自投獯醜，雖復知人，則哲惟帝，其難光武，有蔽于靡萌，魏武不知于于禁，但令朝廷無我負人，其部曲妻兒，各令復業，所在及軍人，若有恐脅侵掠者，皆曰劫論，若有男女口，爲人所滅，竝許詣臺申訴，若樂隨臨川王及節將立效者，悉皆聽許。陳書武帝紀下

擢用舊員詔 永定二年十二月丁亥

梁時舊仕，亂離播越，始還朝廷，多未銓序，又起兵已來，軍勳甚衆，選曹卽條文武簿及節將應九流者，量其所擬。陳書武帝紀下

南康始興二王諸主宜隆禮數詔 永定三年正月

南康始興王諸妹已有封爵，依禮止是藩主，此二王者有殊恆情，

宜隆禮數，諸主儀秩及尚主可竝同皇女。陳書武帝紀下

分卹東陽詔 永定三年閏四月庚寅

開廩賑絕育民之大惠巡方恤患前王之令典朕當斯季俗膺此樂推君德未孚民瘼猶甚重茲多壘彌疚納隍良由四聰弗達千里勿應博施之仁何其或爽殘弊之軌致此未康吳州縉州去歲蝗旱郢田雖兇鄭渠終涸室靡盈積之望家有填壑之嗟百姓不足兆民何賴近已遣中書舍人江德藻銜命東陽與令長二千石問民疾苦仍日入臺倉見米分恤雖德非旣飽庶微慰阻飢

陳書武帝

紀下
定救日儀詔 永定三年五月丙辰朔

此乃前代承用意有未同合朔仰助太陽宜備袞冕之服自今已

去永可爲準

陳書武帝紀下五月景辰朔日有食之有司奏舊儀御前殿服朱紗袍通天冠詔云云又見南史九

討熊曇朗詔 永定三年六月甲午

曇朗噬逆罪不容誅分命眾軍仍事掩討方加梟磔已明刑憲

陳書

武帝紀下

遺虞蒞書

喪亂已來，賢哲凋散，君才用有美，聲聞許洛，當今朝廷惟新，廣求
英雋，豈可棲遲東土，獨善其身？今令兒子將接出都，想必副朝廷
虛遲也。

陳書虞蒞傳

下璽書敕州郡，永定元年十月己卯

夫四正革代，商周所召，應天五勝，相推軒義，所召當運，梁德不造，
喪亂積年，東夏崩騰，西都蕩覆，蕭勃干紀，非唯趙倫，侯景滔天，踰
于劉載，貞陽反篡，賊約連兵，江左累屬于鮮卑，金陵久非于梁國，
有自氤氲混沌之世，龍圖鳳紀之前，東漢興平之初，西朝永嘉之
亂，天下分崩，未有若于梁朝者也。朕曰虛薄，屬當興運，自昔登庸，
首清諸越，徐門浪泊，靡不征行，浮海乘山，所在戡定，冒愬風塵，騁
馳師旅，六延梁祀，十剪疆寇，豈曰人謀，皆由天啟。梁氏曰天祿斯
改，期運永終，欽若唐虞，推其鼎玉，朕東西退讓，拜手陳辭，避舜子

于箕山之陽求支伯于滄洲之野而公卿敦逼率土翹惶天命難稽遂享嘉祚今日乙亥升禮太壇言念遷楓但有慙德自梁氏將末頻月亢陽火運斯終秋霖奄降翌日成禮圓丘宿設埃雲晚露星象夜張朝景重輪泣三危之膏露晨光合璧帶五色之卿雲顧惟寡薄彌慙休祉昧且不顯方思至治卿等擁旌方岳相任股肱剖符名字方寄恤隱王厯惟新念有欣慶想深求民瘼務在廉平愛惠曰撫孤貧威刑曰禦彊悍若有萑蒲之盜或犯戎商山谷之首擅彊幽險皆從肆赦咸使知聞如或迷途俾在無貸今遣使人具宣往旨念思善政副此虛懷

陳書武帝紀下

卽位告天文

皇帝臣霸先敢用玄牡昭告于皇皇后帝梁氏曰圮剝薦臻厯運有極欽若天應曰命于霸先夫肇有烝民乃樹司牧選賢與能未常厥姓放勳重華之世咸無意于受終當涂典午之君雖有心于

揖讓皆曰英才處萬乘高勳御四海故能大庇黔首光宅區縣有
梁末運仍葉遘屯鍾醜憑陵久移神器承聖在外非能祀夏天未
悔禍復罹寇逆嫡嗣廢黜宗枝僭詐天地蕩覆紀綱泯絕霸先爰
初投袂大拯橫流重舉義兵實哉多難廢王立帝實有厥功安國
定社用盡其力是謂小康方期大道既而煙雲表色日月呈瑞緯
聚東井龍見譙邦除舊布新既彰立象遷虞事夏且協謳訟九域
人荒同布衷款百神羣祀皆有誠願梁帝高謝萬邦投曰大寶霸
先自惟菲薄讓德不嗣至于再三辭弗獲許僉曰百姓須主萬機
難曠皇靈眷命非可謙拒畏天之威用膺嘉祚永言夙志能無慙
德敬簡元辰升壇受禪告類上帝用答民心永保于我有陳惟明

靈是饗

陳書武帝紀
下南史九

賜進士出身二品銜廣東等處提刑按察使司按察使兼管驛傳事務黃岡王毓藻校刊

全陳文卷一終

全陳文卷一

武帝

七

全陳文卷二

烏程嚴可均校輯

文帝

帝諱蒨字子華武帝兄始興王道譚之長子梁承聖初爲吳興太守歷信武將軍監南徐州太平初授持節宣毅將軍會稽太守武帝受禪封臨川王拜侍中安東將軍永定三年六月卽位改元二天嘉天康在位七年諡曰文皇帝廟號世祖

卽位大赦詔永定三年六月甲寅

上天降禍奄集邦家大行皇帝背離萬國率土崩心若喪考妣龍圖寶厪眇屬朕躬運鍾擾攘事切機務南面須主西讓禮輕今便式膺景命光宅四海可大赦天下罪無輕重悉皆蕩滌遵祖宿債吏民僣負可勿復收文武內外量加爵敘孝悌力田爲父後者賜爵一級庶祇畏在心公卿畢力勝殘去殺無待百年興言號咷深

增慟絕

陳書文
帝紀

封第二子頊爲始興王詔

永定三年十月

日者皇基肇建封樹枝戚朕親地攸在特啟大邦弟頊嗣承門祀雖土宇開建薦饗莫由重曰遭家不造閔凶夙遘儲貳遐隔轉車未返猥曰眇身膺茲景命式循龜鼎冰谷載懷今旣入奉大宗事絕藩裸始興國廟蒸嘗無王瞻言霜露感尋慟絕其徒封嗣王頊爲安成王封第二子伯茂爲始興王曰奉昭烈王祀賜天下爲父後者爵一級庶申罔極之情永保山河之祚

陳書始興王伯茂傳

詔答沈炯

省表具懷卿譽馳威雖情深宛沛日者理切倚門言歸異域復牽時役遂乖侍養雖周生之思每欲棄官戴禮垂文得遺從政前朝光宅四海劬勞萬機已卿才爲獨步職居專席方深委任屢屈情禮朕嗣奉洪基思弘景業顧茲寡薄兼纏哀疚實賴賢哲同致雍

熙豈便釋簡南闕解紱東路當令馮親入舍荷母從官用觀朝榮
不虧家禮尋敕所司相迎尊累使卿公私得所竝無廢也陳書沈炯傳
改元大赦詔天嘉元年正月癸丑

朕曰寡昧嗣纂洪業哀惇在疚治道弗昭仰惟前德幽顯遐暘恭
己不言庶幾無改雖宏圖懋軌日月方弘而清廟廓然聖靈浸遠
感尋永往瞻言罔極今四象運周三元告獻華夷胥泊玉帛駿奔
思覃遺澤播之億兆其大赦天下改永定四年爲天嘉元年鰥寡
孤獨不能自存立者賜穀人五斛孝悌力田殊行異等加爵一級
陳書文帝紀

親祠南郊詔天嘉元年正月辛酉

朕式饗上玄虔奉牲玉高禋禮畢誠敬兼弘且陰霾浹辰寒霽在
日雲物韶朗風景清和慶動人祇忭流庶俗思俾黎元同此多祐
可賜民爵一級陳書文帝紀

原有王琳黨與詔

天嘉元年二月戊戌

夫五運遞來三靈眷命皇王因之改創殷周所已樂推朕統祚承
基不隆鼎運期理攸屬數祚斯在豈僥倖所至靈卜祝可求故知
神器之重必在符命是已逐鹿貽譏斷地定業亂臣賊子異世同
尤王琳識暗挈瓶智慙衛足干紀亂常自貽顛沛而指紳君子多
被繫維雖涇渭合流蘭鮑同肆求之厥理或有稽從今九戩既設
八紘斯掩天網恢恢吞舟是漏至如伏波游說永作漢蕃延壽脫
歸終爲魏守器改秦度材通晉楚行藏用舍亦豈有恆宜加寬仁
已彰雷作其衣冠士族預在凶黨悉皆原有將帥戰兵亦同肆眚
竝隨才銓引庶收力用

陳書文
帝紀

贈諡死事將士詔

師旅已來將士死王事者竝皆贈諡

陳書文
帝紀

調復丁役詔

天嘉元年二月己亥

日者凶渠肆虐眾軍進討舟艦輪積權倩民丁師出經時役勞日久今氛祲廓清宜有甄被可蠲復丁身夫妻三年于役不幸者復

其妻子

陳書文
帝紀

寬賦詔

天嘉元年三月丙辰

自喪亂已來十有餘載編戶凋亡萬不遺一中原氓庶蓋云無幾頃者寇難仍接算斂繁多且興師已來千金日費府藏虛竭杼軸歲空近所置軍資本充戎備今元惡克殄八表已康兵戈靜戢息肩方在思俾餘黎陶此寬賦今歲軍糧通減三分之一尚書申下四方稱朕哀矜之意守宰明加勸課務急農桑庶鼓腹含哺復在

茲日

陳書文
帝紀

錄序郢州官屬詔

天嘉元年二月丁丑

蕭莊僞署文武官屬還朝者量加錄序

陳書文
帝紀

衡陽王喪柩至下詔

天嘉元年四月庚辰
案本傳作庚寅誤

夫寵章所日嘉德禮數所日崇親乃歷代之通規前王之令典新
除使持節散騎常侍都督湘州諸軍事驃騎將軍湘州牧衡陽王
昌明哲在躬珪璋早秀孝敬內湛聰睿外宣梁季艱虞宗社顛墜
西京淪覆陷身關隴及鼎業初基外蕃逆命聘問斯阻音介莫通
睠彼機橋將鄰烏白今者羣公戮力多難廓清輕傳入郛無勞假
道周朝敦其繼好驂駕歸來欣此朝聞庶歡昏定報施徒語曾莫
輔仁人之云亡殄悴斯在奄焉薨殞倍增傷悼津門之慟空在桓
岫之功不追靜言念之心焉如割宜隆懋典日協徽猷可贈侍中
假黃鉞都督中外諸軍事太宰揚州牧給東園溫明祕器九旒鑾
輅黃屋左纛武賁班劍百人輜輶車前後部羽葆鼓吹葬送之儀
一依漢東平憲王齊豫章文獻王故事仍遣大司空持節迎護喪
事大鴻臚副其羽衛殯送所須隨由備辦

陳書衡陽王昌傳

葬梁元帝詔

天嘉元年六月壬辰

梁孝元遭離多難，靈輓播越。朕昔經北面，有異常倫。遣使迎接，日次近路。江寧既是舊坐，宜卽安卜。車旗禮章，悉用梁典。依魏葬漢

獻帝故事。

陳書文帝紀

進賢詔

天嘉元年七月甲寅

朕日眇身，屬當大寶，負荷至重，憂責實深。而庶績未康，胥怨猶結。佇咨賢良，發于夢想。每有一言入聽，片善可求，何嘗不褒獎拙揚。緘書紳帶，而傳巖虛往。穹谷尙淹，蒲幣空陳。旌弓不至，豈當有乖。則哲使草澤遺才，將時運澆流，今不逮古。側食長懷，寢興增歎。新安太守陸山才，有啟薦梁前征西從事中郎蕭策。梁前尙書中兵郎王暹，竝世胄清華，羽儀著族。或文史足用，或孝德可稱。竝宜登之朝序，擢曰不次。王公已下，其各進舉賢良，申薦淪屈。庶眾才必萃，大厦可成。使械樸載哥，由庚在詠。

陳書文帝紀羅願新安志九

僞舊著籍詔

天嘉元年七月乙卯

自頃喪亂編戶播遷言念餘黎良可哀悵其亡鄉失土逐食流移者今年內隨其適樂來歲不問僑舊悉令著籍同土斷之例

陳書文帝

紀通

典三

種麥詔 天嘉元年八月壬午

菽粟之貴重于珠玉自頃寇戎游手者眾民失分地之業士有佩犢之譏朕哀矜黔庶念康樂俗思俾阻飢方存富教麥之爲用要切斯甚今九秋在節萬寶可收其班宣遠近並令播種寸宰親臨勸課務使及時其有尤貧量給種子

陳書文帝紀

禁奢麗詔

天嘉元年八月戊子

汗罽土鼓誠則難追畫卯彫紱或可易革梁氏末運奢麗已甚芻豢厭于胥史歌鐘列于管庫牛木被朱丹之采車馬飾金玉之珍逐欲澆流遷訛遠朕自諸生頗爲肉足而家敦樸素室靡浮華觀覽時俗常所扼腕今妄假時乘臨馭區極屬當淪季思開治道

菲食卑宮自安儉陋俾茲薄俗獲反宿風維雕鏤淫飾非兵器及國容所須金銀珠玉衣服雜玩悉皆禁斷

陳書文
帝紀

召方泰爲南康世子詔

天嘉元年

南康王曇朗出隔齊庭反身其洲國朗方修莫響須主可召長男

方泰爲南康世子嗣南康王後

陳書南康王
曇朗附傳

停春夏使罪詔

天嘉元年十二月乙未

古者春夏二氣不決重罪蓋召陽和布澤天秩是弘寬網省刑義

符含育前王所召則天象地立法垂訓者也朕屬當澆季思求民

瘼哀矜惻隱念甚紉隍常欲式遵舊軌用長風化自今孟春訖于

夏首罪人大辟事已款者宜且申停

陳書文
帝紀

詔咎沈不害

天嘉初

省表聞之自舊章弛廢微言將絕朕嗣膺寶業念在緝熙而兵革

未息軍國草創常恐前王令典一朝泯滅卿才思優洽文理可求

引惜大體殷勤名教付外詳議依事施行陳書沈不害傳

已侯瑱等配食高祖廟庭詔天嘉二年九月甲寅

姬業方闡望載渭濱漢麻既融道通圯上若乃儲精辰宿降靈惟

岳風雲有感夢寐是求斯固舟楫鹽梅遞相表裏長世建國罔或

不然至于銘德太常從祀清廟日貽厥後來垂諸不朽者也前皇

經濟區宇裁成品物靈貺式甄光膺寶命雖慕明濬發幽顯協從

亦文武賢能翼宣王業故大司馬驃騎大將軍瑒故司空文育故

平北將軍開府儀同三司僧明故中護軍穎故領軍將軍擬或締

構艱難經綸夷險或摧鋒冒刃殉義遺生或宣哲協規綱繆帷幄

或披荆汗馬終始勤劬莫不罄誠悉力屯泰日之朕已寡昧嗣膺

丕緒永言勳烈思引典訓便可式遵故實載揚盛軌可竝配食高

祖廟庭俾茲大猷永傳宗祏陳書文

下詔討雷異天嘉二年十二月丙戌

昔四罪難弘、大憝之所無赦、九黎亂德、少昊之所必誅、自古皇王、不貪征伐、苟爲時蠹、事非獲已、逆賊雷異、數應亡滅、繕甲完聚、由來積年、進謝羣龍、自躍于千里、退讓首鼠、恆持于百心、中歲密契、番禺、旣引天網、賜曰名爵、敦曰國姻、僞望懷音、猶能革面、王琳竊據中流、翻相應接、別引南川之嶺路、專爲東道之主人、結附凶渠、唯欣禍亂、旣祆氛盪定、氣沮心孤、類傷鳥之驚絃、等窮獸之謀解、雖復遣家人質、子陽之態轉逆、侍子還朝、隗囂之心方熾、朕志相成、養不計疵、應披襟解帶、敦喻殷勤、蜂目彌彰、梟聲無改、遂置軍江口、嚴戍下淮、顯然反叛、非可容匿、且緡邦膏腴、稽南殷曠、永割王賦、長壅國民、竹箭良材、絕望京輦、桂蒲小盜、共肆貪殘、念彼餘賾、兼其慨息、西戎屈膝、自款重關、秦國依風、竝輸侵地、三邊已乂、四表咸寧、唯此微妖、所宜清殄、可遣使持節都督南徐州諸軍事、征北將軍司空南徐州刺史桂陽郡開國公安都指往擒戮、罪止

異身餘無所問

陳書畱異傳

贈諡南康王曇朗詔

天嘉二年

夫追遠慎終抑聞前誥南康王曇朗明哲懋親蕃維是屬入質北齊用紆時難皇運兆興未獲旋反永言跂予日夜不忘齊使始至凶問奄及追懷痛悼兼倍常情宜隆寵數日光恆序可贈侍中安東將軍開府儀同三司南徐州刺史諡曰愍

陳書南康王曇朗傳

南郊恩詔

天嘉三年正月辛亥

朕負荷靈圖亟回星璫兢兢業業庶幾治定而德化不孚俗獎滋甚永言念之無忘日夜陽和布氣昭事上玄躬奉牲玉誠兼饗敬思與黎元被斯寬惠可普賜民爵一級其孝悌力田別加一等

陳書

文帝紀

收侯安都詔

天嘉四年六月癸巳

昔漢厚功臣韓彭肇亂晉倚蕃牧敦約稱兵託六尺于龐萌野心

竊發寄股肱于霍禹凶謀潛構追惟往代挺逆一揆永言自古患難同規侯安都素乏遙圖本慙令德幸屬興運預奉經綸拔跡行閒假之毛羽推于偏帥委已馳逐位極三槐任居四嶽名器隆赫禮數莫儔而志唯矜己氣在陵上招聚逋逃窮極輕狡無賴無行不畏不恭受服享征剽掠一逞惟穀所鎮夏徼無厭寄已徐菴接鄰齊境買遷禁貨鬻賣居民椎埋發掘毒流泉壤睚眦僵尸罔顧彝憲朕已爰初締構頗著功績飛驂代邸預定嘉謀所已淹抑有司每懷遵養杜絕百辟日望自新款襟期于話言推丹赤于造次策馬甲第羽林息警置酒高堂陞戟無衛何嘗內隱片嫌去柏人而勿徇外協猜防入成皋而不畱而勃戾不悛驕暴滋甚招誘文武密懷異圖去年十二月十一日獲中書舍人蔡景祿啟稱侯安都去月十日遣別駕周弘實來景祿私省宿徧訪問禁中具陳反計朕猶加隱忍待之如初爰自北門遷授南服受命經停奸謀益露

今者欲因初鎮將行不軌此而可忍孰不可容賴社稷之靈近侍
誠懇醜情彰暴逆節顯聞外可詳案舊典速正刑書止在同謀餘

無所問

陳書侯安都傳

己周鐵虎配食高祖廟庭詔

天嘉五年三月壬午

漢室功臣形寫宮觀魏朝猛將名配宗祧功烈所已長存世代因
之不朽故侍中護軍將軍青冀二州刺史沌陽縣開國侯鐵虎誠
節鯁亮力用雄敵王業初基行開累及垂翅賊壘正色寇庭古之
遺烈有識同壯隕身不屈雖隆榮等營魂易遠言追嘉惜宜仰陪
塋寢恭頒饗奠可配食高祖廟庭

陳書周鐵虎傳

曲赦京師詔

天嘉五年七月丁丑

朕已寡昧屬當負重星籙亟改寃旒弗曠不能仰協璿衡用調玉
燭俯慰蒼生已安黔首兵無寧歲民乏有年移風之道未弘習俗
之患猶在致令氓多觸網吏繁筆削獄犴滋章雖由物犯固囿淹

濫亦或有冤念俾納隍載勞負戾加日膚湊不適攝衛有虧比獲微痊思覃實惠可曲赦京師陳書文帝紀

賻卹周敷詔天嘉五年

使持節散騎常侍都督南豫州緣江諸軍事鎮南將軍南豫州刺史西豐縣開國侯敷受任遐征淹時違律虛矜奸詭遂貽喪什但夙著勤誠亟勞戎旅猶深惻愴愍悼于懷可存其茅賦量所賻卹陳書周敷傳

許建安等郡流民還本詔天嘉六年三月乙未

侯景已來遭亂移在建安晉安義安郡者並許還本土其被略爲奴婢者釋爲良民陳書文帝紀

脩治古忠烈墳冢詔天嘉六年八月丁丑

梁室多故禍亂相尋兵甲紛紜十年不解不逞之徒虐流生氣無賴之風暴及徂魂江左肇基王者攸宅金行水位之主木運火德

之君時更四代歲逾二百若其經綸三業縉紳民望忠臣孝子何
世無才而零落山上變移陵谷或皆翦伐莫不侵殘玉杯得于民
閒漆簡傳于世載無復五株之樹罕見千年之表自大祚光啟恭
惟揖讓爰暨朕躬聿脩祖武雖復旂旗服色猶行杞宋之計每車
駕巡遊眇瞻河雒之路故喬山之祀蘋藻弗虧驪山之墳松柏恆
守唯戚藩舊壘士子故塋掩殮未周樵牧猶眾或親屬流隸負土
無期子孫冥滅手植何寄漢高畱連于無忌宋祖惆悵于子房上
基生哀生靈共惻者也朕所已興言永日思慰幽泉維前代王侯
自古忠烈墳冢被發絕無後者可檢行脩治墓中樹木勿得樵採
庶幽顯咸鳴稱朕意焉

陳書文
帝紀

曲赦京師詔

天嘉六年十二月癸亥

朕自居民牧之重託在王公之上顧其寡昧繆于治道加已屢虧
聽覽事多壅積免滯歷中幽枉弗鑒念茲罪戾有甚納隍而惠澤

未流愆陽累月今歲序云暮元正向肇以使幽圖之內同被時和

可曲赦京師

陳書文
帝紀

改元大赦詔

天康元年二月丙子

朕自寡德纂承洪緒日昃劬勞思弘景業而政道多昧黎庶未康兼疹患淹時亢陽累月百姓何咎實由朕躬念茲在茲痛如疾首可大赦天下改天嘉七年爲天康元年

陳書文
帝紀

遺詔

天康元年四月

朕疾苦彌留遂至不救脩短有命夫復何言但王業艱難頻歲軍旅生民多弊無忘愧惕今方隅乃定俗教未弘便及大漸百爲遺恨社稷任重太子可卽君臨王侯將相善相輔弼內外協和勿違朕意山陵務存儉速大斂竟羣臣三日一臨公除之制率依舊典

陳書文

帝紀

敕虞荔

能敦布素乃當爲高卿年事已多氣力稍減方欲仗委良須克壯
今給卿魚肉不得固從所執也

陳書虞
荔傳

策命鄱陽王

天嘉元年十月

於戲夫建樹藩屏翼獎王室欽若前典咸必由之惟爾夙挺珪璋
坐知孝敬令德茂親僉譽所集啟建大邦實惟倫序是用敬遵民
瞻錫此圭瑞往欽哉其勉樹聲業永保宗祚可不慎歟

陳書鄱陽
王伯山傳

與虞荔書

君東南有美聲譽洽聞自應翰飛京許共康時弊而削迹巨園保
茲獨善豈使稱空谷之望邪必願便尔傲裝且爲出都之計唯遲
披靄在于茲日

陳書虞
荔傳

妙法蓮華經懺文

菩薩戒弟子皇帝稽首和南十方諸佛無量尊法一切聖賢竊曰
前佛後佛種種因緣已說當說各各方便莫非眞語悉爲妙法理

無二極起必同歸。但因業因心稟萬類之識。隨見隨著。異羣生之
相。品位分淺深。覺悟有遲速。法而一味得之者。參差法雷一音。問
之者差別。是曰小乘頓教。由此各名。聲聞菩薩。因斯分路。至如鹿
苑初說。羊車小乘。灰斷涅槃。分段解脫。曰諸佛之善巧。會眾庶之
根機。是曰半字。未稱三點。及夫會三歸一。反本還源。說大乘經。名
無量義。滅化城于中路。駕寶車于四衢。衣裘明珠。隱而還見。髻中
眞寶。于焉始得出。寶塔于空虛。踰菩薩于大地。見希有事。證微妙
法。最勝最尊。難逢難值。弟子曰。因地凡夫。屬符負荷。方欲憲章古
昔。用拯黎元。竊曰。羲皇結繩。深失大慈。成湯解羅。猶非妙善。揚旌
丹水。異道樹而降魔。執玉塗山。非寶坊之大集。所曰憑心七覺。繫
念四勤。住菩薩乘。顯無三之敎。學如來行。開不二之門。汲引羣迷。
導示眾惑。今謹于某處。建如干僧。如干日。法華懺。見前大眾。至心
敬禮。釋迦如來。多寶世尊。禮妙法華大乘經典。禮普賢菩薩妙光。

法師願多寶如來從地湧出普賢菩薩乘象空來並入道場證明
功德擊大法鼓轉妙法輪震動世間覺悟凡品令使盡空法界無
量聲聞無邊眾生皆爲菩薩總持性相同到無生稽首敬禮常住

三寶

廣宏明集
二十八下

金光明經懺文

菩薩戒弟子皇帝稽首和南十方諸佛無量尊法一切賢聖尋夫
靈鷲山間自有常住之相白鶴林處本無變易之法故知眞解脫
者誰辯去來實智慧者非有生滅而顛倒迷愚不曉三點之理無
明覆蔽空有八十之疑于是四佛世尊百千菩薩俱會信相之室
顯說釋迦之壽明稱歎之妙偈出懺悔之法音是日經王微妙第
一、日種智爲根本日功德爲莊嚴能照諸天宮殿能與眾生快樂
能銷變異惡星能除穀貴饑饉能遣怖畏能滅憂惱能怯怨敵能
愈疾病如法修行功德已甚弟子日茲晷昧慕承洪業常恐王領

之宜不符正論御世之道有乖天律庶績未康黎民弗乂方願歸
依三寶憑藉冥空護念眾生扶助國土今謹于某處建如千僧如
千日金光明懺見前大眾至心敬禮釋迦如來四佛世尊金光明
經信相菩薩願諸菩薩久住世間諸天善神不離土境方便利益
增廣福田映慈悲雲開智慧日作眼目導爲依止所成就菩提之
道場安住不動之境國稽首敬禮常住三寶

廣宏明集
二十八下

大通方廣懺文

菩薩戒弟子稽首和南十方三寶竊曰諸佛刹土不可言說如來
稱號無有限量或過去現在共取頗羅之姓或同時異世俱有釋
迦之名或明王十億或然燈三萬去來三界遍滿十方聞名者離
塵受持者得道其爲功德難用思議釋迦如來已無礙力遊娑羅
之淨道止吉祥之福地寶池化生金花自涌說大通方廣出三寶
名號譬如六天總歸一乘弟子用慈悲之心修平等之業常日萬

那有罪責自一人四生未安理爲重任所日薰修在己日夜忘勞
精進爲心夜分未息菩薩行處皆願受持諸佛法門悉令如說欲
使普天率土無復怖畏之塵蠕動蜎飛永得歸依之地今謹依經
教于某處建如干僧如干日行方廣懺悔讀誦百遍右遶七匝塗
香末香盡莊嚴之相正念止觀罄精懇之心見前大眾至心敬禮
本師釋迦如來禮方廣經中所說三寶名字願諸佛菩薩尋聲赴
響放淨光明照諸暗濁施清涼水滅茲渴愛登六度舟入三昧海
總萬有而會真如齊三界而登寶法稽首敬禮常住三寶

廣宏明
集二十

虛空藏菩薩懺文

竊以菩薩之于眾生是大依止觀察性相隨機齊拔一人未度不
證善果往古今來行願如一而虛空藏菩薩最爲勝上爲眾中之
幢王爲大明之尊主具諸佛之智慧得如來之祕密至因夢見形

隨緣示机、一聞稱號、水火不能焚溺、一心稱名、刀杖不能傷害、壽命財產之願念而必諧、色聲味觸之須求而皆遂、身心疾惱憐愍、療治牢獄怖畏、方便解釋、此蓋隨從世法、安樂眾生、及夫動神變相、去香集之境、放淨光明、來閻浮之界、入三昧定、除煩惱熱、說陀羅尼、破惡業障、五濁惡世、一時清涼、五根本罪、竝皆解脫、此則開世閒之眼、示涅槃之路、弟子承如來之教、稟諸佛之慈、國被菩薩之功、家行大士之業、方願十方刹土、悉有一乘、十方眾生、皆修十地、今謹于某處、建如干僧、如干日、虛空藏菩薩懺、見前大眾至心敬禮、本師釋迦文佛、禮勝花敷藏如來、禮陀羅尼神咒、禮虛空藏菩薩、願虛空藏菩薩尋賢應赴、現神通力、開智慧光、已種種身遊諸國土、度脫眾生、不乖誓願、稽首敬禮、常住三寶、廣宏明集二十八下

方等陀羅尼齋懺文

竊以三世諸佛、日誓願因緣、十方如來、日智慧方便、縱無礙之辯、

名下種字
當作稱

開無盡之門、法流派別、宗源無限、法本分散、枝條不極、非直摩訶
般若、獨有人萬四千、至于陀羅尼門、亦有九十二億、處處宣說、種
種名種、功德無量、威神不測、至如婆藪之拔地獄、波旬之發菩提
花、聚之獲神通、雷音之脫掩蔽、莫不因斯章句、承茲業力、亦有四
部弟子、十方眾生、聞一句而發心、聽一說而悅道、故知一切諸法、
無非真妙、弟子側身修行、所學者菩提、肝食夙興、所行者濟度、一
心之力、攝取眾生、一念之頃、遍諸法相、如來種智、皆願總持、諸佛
功德、悉欲流布、今謹于法典本之經教、見前大眾至心敬禮釋迦
牟尼佛、禮陀羅尼章句、禮雷音比丘、禮華聚菩薩、願承此功德、調
伏眾生、滅三毒心、破十惡業、四百之煩惱、自然清淨、八萬四千座
勞、一時解脫、得神咒之力、具法印之善、入陀羅尼門、觀諸佛境界、
頓消獄火、永盡無餘、稽首敬禮、常住三寶、廣宏明集二十八下

藥師齋懺文

竊已諸行無常、悉爲累法、萬有顛倒、皆成苦本、然微鏡像、如變易之不停、漂草繫某、見生滅之奔迅、隨業風而入苦海、遂報障而趣幽途、去來三界、未見可安之所、輪迴五道、終無暫息之期、藥師如來有大誓願、接引萬物、救護眾生、導諸有之百川、歸法海之一味、亦能施與花林、隨從世俗、使得安樂、令無怖畏、至如八難九橫、五濁三災、水火盜賊、疾疫饑饉、怨家債主、王法縣官、憑陵之勢、萬端虔劉之法、千變悉能轉禍爲福、改危成安、復有求富貴、須祿位、延壽命、多子息、生民之大欲、世間之切要、莫不隨心應念、自然滿足、故知諸佛方便、事絕思量、弟子司牧寡方、庶績未乂、方憑藥師本願、成就眾生、今謹依經教、于某處建如干僧、如干日、藥師齋懺、現前大眾至心敬禮、本師釋迦如來、禮藥師如來慈悲廣覆、不乖本願、不棄世間、興四等雲、降六度雨、滅生死火、除煩惱箭、十方世界、若輪燈而明朗、七百鬼神、尋結縷而應赴、障逐香然、災無復有、命

隨幡續漸登常住遊甚深之法性入無等之正覺行願圓滿如藥

師如來

廣宏明集二十八下

娑羅齋懺文

尋夫眞解脫者本自不生實智慧者今亦無滅故知鶴林變色非
變易之文鷲山常在實常住之法但世界不一應赴所召不窮眾
生無邊方便所召無際隨念隨著種種法門因業因心各各示見
或八十小劫端坐之相未移方八十年無餘之機已及熙連河側
晨朝之色忽明娑羅樹間中夜之聲便寂最後功德是曰茲辰弟
子有緣聞淨屬當重任愍羣生之顛倒嗟庶類之愚迷常願造六
度之舟濟之于彼岸駕一乘之御驅之于中道今謹于太極殿設
無礙大會首僧一少娑羅大齋願法雨法雲清涼三界之火慧燈
慧炬照朗百年之室常住二字人天共聞伊字三點凡聖並悟無
勞迦葉之問不待須臾之疑一切種智而爲根本無量功德召自

莊嚴意樹開解脫之花身田含定慧之水居處吉祥之地枕藉福
德之場與二氣而俱貞隨四時而納祐日月天子照合璧于大千
星辰宮殿散連珠于百億慈悲輕雨與祥風而並飛菩提寶雲共
飛煙而合彩六合四海無復塵勞六道四生俱蒙清淨廣宏明集
二十八下
無礙會捨身懺文

竊觀雅誥與義皇上興在予之言禮經合典聖人揚罪己之說故
亡身濟物仁者之恆心克己利人君子之常德況復菩薩大士法
本行處應赴三界攝受四生運無量之四心修平等之六度國城
妻子僂俛哀荒承祖宗之大業扶曳喘息當天下之重任黎民弗
又庶績未熙御朽履冰無忘兢業又曰世相泡影有爲露電愛河
奔迅欲海飛騰稟識同焚含靈共溺垂璫憑玉還覺萬乘非尊當
宁負展翻巨萬機成累夕惕若厲思宏汲引每旦丕顯奉爲七廟
聖靈奉爲皇太后聖御奉爲天龍鬼神幽冥空有三界四生五道

六塵若色若想若怨若親若非怨親遍虛空滿法界窮過去盡未來無量名識一切種類平等大捨弟子自身及乘輿法服五服鑾輅六冕龍章玉几玄裘金輪紺馬珠交纓絡寶飾莊嚴給用之所資待生平之所玩好並而檀那咸施三寶今謹于前殿設無礙大會奉行所願并諸功德具列于前願諸菩薩冥空幽顯俱到證明開智慧日映慈悲雲樹寶幢于大千擊法鼓于百億震動世界覺悟羣生放三昧之淨光流一味之法雨引愚癡于火筌拔煩惱于棘林出輪轉河到無生岸

廣宏明集二十八下

賜進士出身三品銜廣東等處提刑按察使司按察使兼管驛傳事務黃岡王毓藻校刊

全陳文卷一終

全陳文卷三

烏程嚴可均校輯

廢帝

帝諱伯宗字奉業小字藥王文帝長子永定二年拜臨川王世子文帝卽位立爲皇太子天康元年卽位明年改元光大在位二年宣太后令廢爲臨海王

卽位大赦詔

天康元年四月癸酉

上天降禍大行皇帝奄棄萬國攀號靡及五內崩殞朕曰寡德嗣膺寶命熒熒在疚懼甚綴旒方賴宰輔匡其不逮可大赦天下

廢帝

紀

改元大赦詔

光大元年正月乙亥

昔昊天成命降集寶圖二后重光九區咸乂閔余冲薄王道未昭荷茲神器如涉靈海庶親賢並建牧伯惟良天下雍熙緬同刑措

今三元改厯萬國充庭清廟無追其倏斯在言瞻宇位觸感崩心思播遺恩俾覃黎獻可大赦天下改天康二年爲光大元年孝悌

力田賜爵一級

陳書廢帝紀

收到仲舉等付廷尉詔

光大元年八月

到仲舉庸力小才坐叨顯貴受任前朝榮寵隆赫父參王政子據大邦禮盛外姻勢均戚里而肆其驕閭凌傲百司遏密之初擅行國政排黜懿親欺蔑台衮韓子高叢介細微擢自卑末入參禁衛委曰心腹蜂蠆有毒敢行反噬仲舉子高共爲表裏陰構姦謀密爲異計安成王朕之叔父親莫重焉受命尊揚稟承顧託曰朕冲弱屬當保祐家國安危事歸宰輔伊周之重物無異議將相舊臣咸知宗仰而率聚凶徒欲相掩襲屯據東城進逼崇禮規樹仲舉曰執國權陵丘司徒意在專政潛結黨附方危社稷賴祖宗之靈姦謀顯露前上虞令陸昉等具告其事並有據驗并刻今月七日

縱其凶惡，領軍將軍明徹、左衛將軍衛尉卿竇安及諸公等，又並知其事。二三疊迹，彰于朝野。反道背德，事駭聞見。今大愆克殲，罪人斯得，並可收付廷尉，肅正刑書。罪止仲舉父子及子高三人而已，其餘一從曠蕩，並所不問。陳書到仲舉傳

誅華皎家口詔

光大元年九月乙巳

逆敗華皎，極惡窮凶，遂樹立蕭歸，謀危社稷，棄親卽讎，人神憤惋。王師電速，水陸爭前，梟剪之期，匪朝伊暮。其家口在北里，尙方宜從誅戮，用明國憲。陳書廢帝紀

曲赦湘巴二郡詔

光大元年十月辛巳

賊皎興皂微賤，特逢獎擢，任據藩牧，屬當寵寄，背斯造育，興構姦謀，樹立蕭氏，盟約彰露，鳩毒存心，志危宗社，扇結邊境，驅逼士庶，蟻聚巴湘，不突駢跽，逆天反地，人神忿嫉，征南將軍量安、南將軍明徹、郢州刺史靈洗，受律專征，備盡心力，撫勞騁雄，舟師俱進，義

烈爭奮兇惡奔殄獻捷相望重氛載廓言念泣罪思與惟新可曲
赦湘巴二州凡厥爲賊所逼制預在兇黨悉皆不問其賊主帥節
相竝許開恩出首一同曠蕩

陳書華
皎傳

卹死事軍人詔

光大二年正月庚子

討華皎軍人死王事者竝給棺槨送還本鄉仍復其家

陳書廢
帝紀

宣帝

帝諱頊字紹世小字師利文帝第二弟梁承聖中爲直閤將軍
中書侍郎江陵陷隨例入關陳受禪遙襲父道譚爵始興王文
帝卽位改封安成王天嘉三年自周還授侍中中書監中衛將
軍尋授使持節揚州刺史進號驃騎將軍加開府儀同三司遷
司空天康初授尙書令廢帝卽位拜司徒進驃騎大將軍錄尙
書都督中外諸軍事進太傅光大二年宣太后令廢帝爲臨海
王三年正月卽位改元太建在位十四年諡曰孝宣皇帝廟號

高宗

卽位改元大赦詔 太建元年正月甲午

夫聖人受命王者中興竝由懿德方作元后高祖武皇帝揖拜堯
圖經綸禹跡配天之業光辰象而利貞格地之功俾川岳而長遠
世祖文皇帝體上聖之姿當下武之運築宮示儉所務唯德定鼎
初基厥謀斯在朕曰寡薄才非聖賢夙荷前規方傳景祚雖復親
承訓誨志守藩維詠季子之高風思城陽之遠託自元儲紹國正
位君臨無道非幾佇聞刑措豈圖王室不造頻謀亂階天步艱難
將傾寶祚仰惟嘉命爰集朕躬我心貞確堅誓蒼昊而羣辟啟請
相諠渭橋文母尊嚴懸心長樂對揚璽紱非止股湯之三辭履步
春冬何但代王之五讓今便肅奉天策欽承介主若據滄溟踰增
兢業思所召雲行雨施品物咸亨當與黔黎普同斯慶可改光大
三年爲大建元年大赦天下在位文武賜位一階孝悌力田及爲

父後者賜爵一級異等殊才並加策序鰥寡孤獨不能自存者人

賜穀五斛陳書宣帝紀

卹軍士死傷詔太建二年三月丁未

自討周迪華皎已來兵交之所有死亡者並令收斂並給棺槨送

還本鄉瘡痍未瘳者各給醫藥陳書宣帝紀

安處新附詔太建二年八月甲申

平當作年

懷遠已德抑惟恆典去戎即華民之本志頃平江介經負相隨崎

嶇歸化亭候不絕宜加卹養答其誠心維是荒境自投有在都邑

及諸州鎮不問遠近並蠲課役若克平舊土反我侵地皆許還鄉

一無拘限州郡縣長明加甄別良田廢材隨便安處若輒有課訂

即已擾民論陳書宣帝紀

行新政詔
民惟邦本著在典謨治國愛民抑又通訓朕聽朝晏罷日仄劬勞

方流惠澤，覃被億兆。有梁之季，政刑廢缺，條綱弛紊，僭盜荐興，役賦征徭，尤爲煩刻。大陳御寓，拯茲餘弊，滅虐戡黎，弗遑創政。年代彌流，將及成俗，如弗解張，物無與厝。夕惕疚懷，有同首疾。思從卑菲，約已濟民。雖府帑未充，君孰與足，便可刪革，去其泰甚。冀永爲定準，令簡而易從。自今維作，田值水旱未收，卽列在所言上，折除軍士半登六十，悉許放還。巧手干役死亡，及與老疾不勞，訂補其籍，有巧隱，并王公百司，輒受民爲程蔭，解還本屬，開恩聽首在職治事之身，須通相檢示，有失不推。當局任罪，令長代換，其條解舍戶數付度，後人戶有增進，卽加躍賞。若致滅散，依事準給，有能墾起荒田，不問頃畝多少，依舊蠲稅。陳書宣帝紀

原逆黨詔 太建三年三月丁丑

犯逆子弟支屬逃亡異境者，悉聽歸首見執繫者，量可散釋，其有

居宅並追還。

陳書宣帝紀

班宣兵法詔

太建四年八月戊寅

國之大事受朕興戎師出已律稟策于廟所已又安九有克成七德自頃掃滌羣穢廓清諸夏乃貔貅之戮力亦帷幄之運籌雖左衽已戡干戈載戢呼韓來謁亭郭無警但不教民戰是謂棄之仁必有勇無忘武備礪溪之傳韜畝穀城之授神符文叔懸制戎規孟德頗言兵略朕既慙暗合良皆披覽兼昔經督戎備嘗行陣齊已七步肅之三鼓得自智襟指掌可述今竝條制凡十三科宜卽班宣已爲永準

陳書宣帝紀

令內外舉賢極諫詔

太建四年九月辛亥

舉善從諫在上之明規進賢謁言爲臣之令範朕已寡德嗣守寶圖雖世襲隆平治非靈一辨方分職吁食早衣傍闕爭臣下無貢士何其闕爾鮮能抗直豈余獨運匪薦謫言置鼓公車罕論得失施石象魏莫陳可否朱雲摧檻良所不逢禽息觸檻又爲難進至

如衣禍日見擔登日遊或者艾絕倫或妙年異等千時而不偶左右莫之譽黑貂改弊黃金且殫終身滯淹可爲太息又貴爲百辟賤有十品工拙並糴勸沮莫分街謠徒擁廷議斯闕實朕之弗明而時無獻替永言至治何適爽歟外可通示文武凡厥在位風化乖殊朝政紕繆正色直辭有犯無隱兼各舉所知隨才明試其若政廉穢在職能否分別矢言俟茲黜陟

陳書宣帝紀

分畱罷任之徒佳姑孰詔

太建四年閏十一月辛未

姑孰饒曠荆河斯擬博望關畿天限嚴峻龍山南指牛渚北臨對熊繹之餘城邇全琮之故壘良疇美柘畦畎相望連宇高薨阡陌如繡自梁末兵災凋殘略盡比雖務優寬猶未克復咫尺封畿宜須殷阜且眾將部下多寄上下軍民雜俗極爲蠹耗自今有罷任之徒許分畱部下其已在江外亦令迎還悉住南州津裏安置有無交貨不責市估萊荒墾闢亦停租稅臺遣鎮監一人共刺史津

主分明檢押給地賦田各立頓舍

陳書宣帝紀

創築東宮詔

太建四年十二月丁卯

梁氏之季兵火薦臻承華焚蕩頓無遺構寶命惟新迄將二紀頻事戎旅未遑脩繕今工役差閑椽楹有擬來歲開肇創築東宮可權置起部尚書將作大匠用主監作

同上

皇孫胤生詔

太建五年三月己丑吳興王胤傳作二月乙丑

皇孫初誕國祚方熙思與羣臣共同斯慶内外文武賜帛各有差爲父後者賜爵一級

陳書吳興王胤傳

克壽陽下詔

梁末得懸瓠已壽陽爲南豫州今者克復可還爲豫州已黃城爲司州治下爲安昌郡滎陽爲漢陽郡三城依梁爲義陽郡並屬司州

陳書宣帝紀

已吳明徹爲豫州刺史詔

太建五年十月丙辰

壽春者古之都會襟帶淮汝控引河洛得之者安是稱要害侍中
使持節都督征討諸軍事征北大將軍開府儀同三司南平郡開
國公明徹雄圖克舉宏略蓋世在昔屯夷締構皇業乃掩衡岳用
清氛沴寶吞雲夢卽敘上游今茲蕩定恢我王略風行電掃貔武
爭馳月陣雲梯金湯奪險威陵殊俗惠漸邊氓惟功與能元戎是
鳳崇麾廣賦茂典恆宜可都督豫合建光朔北徐六州諸軍事車
騎大將軍豫州刺史增封并前三千五百戶餘如故

陳書吳明徹傳

還王琳等首詔

太建五年十二月壬辰

古者反噬叛逆盡族誅夷所已藏其首級誠之後世比者所戮止
及一身子胤或存梟懸自足不容久歸武庫長比月支惻隱之懷
有仁不忍維熊曇朗畱異陳寶應周迪鄒緒等及今者王琳首竝
還親屬已弘廣宥

陳書宣帝紀

案北齊書王琳傳琳故吏朱瑒致書陳尙書侯射徐陵求琳首陵感其志節明

徹亦數夢琳求首竝爲啟陳主而許之

卷三
赦江右淮北等州詔

太建六年正月壬戌

王者曰四海爲家萬姓爲子一物乖方夕惕猶厲六合未混肝食
彌憂朕嗣纂鴻基思弘經略上符景宿下叶人謀命將興師大拯
淪溺灰琯未周凱捷相繼拓地數千連城將百蠢彼餘黎毒茲異
境江淮年少猶有剽掠鄉閭無賴摘出陰私將帥軍人罔顧刑典
今使苛法蠲除仁聲載路且肇元告慶邊服來荒始覩皇風宜覃
曲澤可赦江右淮北南司定霍光建朔合豫北徐仁北兗青冀南
譙南兗十五州鄆州之齊安西陽江洲之齊昌新蔡高唐南豫州
之歷陽臨江郡士民罪無輕重悉皆原宥將帥職司軍人犯法自
依常科

陳書宣
帝紀

緩南川等州田租詔

太建六年三月癸亥

去歲南川頗言失稔所督田租于今未卽豫章等六郡太建五年
田租可申半至秋豫章又遭太建四年檢首田稅亦申至秋南康

一郡嶺下應接民間尤獎太建四年田租未入者可特原除庶脩

墾無廢歲取方實

陳書宣帝紀

慰撫胸山黃郭詔

太建六年四月辛丑

戢情懷善有國之令圖拯獎救危聖範之通訓近命師薄伐義在濟民青齊舊隸膠光部落久患凶戎爭歸有道棄彼農桑忘其衣食而大軍未接中途止憩胸山黃郭車營布滿扶老攜幼蓬流草敗既喪其本業咸事遊手饑饉疾疫不免流離可遣大使精加慰撫仍出陽平倉穀拯其懸罄并充糧種勸課士女隨近耕種石墾等屯適意脩墾

陳書宣帝紀

贈諡周弘正詔

太建六年六月

追遠褒德抑有恆規故尚書右僕射領國子祭酒豫州大中正弘正識宇凝深甄業通備辭林義府國老民宗道映庠門望高禮閣卒然殂殞朕用惻然可贈侍中中書監喪事所須量加資給便出

臨哭謚曰簡子

陳書周弘正傳

給吳明徹麾鉞詔 太建八年二月

昔者軍事建旌交鋒作鼓頃日訛替多乖舊章至于行陣不相甄

別今可給司空大都督鉞鉞龍麾其次將各有差

陳書吳明徹傳

凱旋大會詔 太建八年四月甲寅

元戎凱旋羣師振旅旌功策賞宜有饗宴今月十七日可幸樂遊

苑設絲竹之樂大會文武

陳書宣帝紀

原逋租詔 太建九年五月丙子

朕昧旦求衣日旰方食思引億兆用臻俾乂而牧守莅民廉平未

洽年常租賦多致逋餘卽此務農宜引寬省可起太建已來訖八

年流移叛戶所帶租調七年八年叛義丁五年訖八年叛軍丁六

年七年逋租田米粟夏調綿絹絲石麥等五年訖七年逋貲絹皆

悉原之

陳書宣帝紀

量酬軍功詔

太建十年四月庚戌

懋賞之言明于訓誥挾纊之美著在撫巡近歲薄伐廓清淮泗摧鋒致果文武畢力櫛風沐雨寒暑亟離念功在茲無忘終食宜班榮賞用酬厥勞應在軍者可竝賜爵二級并加資卹付選即便量

處

陳書宣
帝紀

停減供御詔

惟堯葛衣鹿裘則天爲大伯禹黻衣菲食夫子曰無閒然故儉德之恭約失者鮮朕君臨宇宙十變年籥旰日勿休乙夜忘寢跂子思治若濟巨川今茲在茲懷同馭朽非貪四海之富非念黃屋之尊導仁壽已宣羣生寔勞役已奉諸已但承梁季亂離斯瘼宮室禾黍有名亡處雖輪奐未覩頗事經營去泰去甚猶爲勞費加已戎車屢出千金日損府帑未充民疲征賦百姓不足君孰與足興言靜念夕惕懷抱垂訓立法良所多慙嘶離爲杜庶幾可慕雉頭

之服既焚戈綈之衣方襲損撤之制前自朕躬草偃風行冀已變俗應御府堂署所營造禮樂儀服軍器之外其餘悉皆停息按庭

常供王侯妃主諸有俸餼並各量減

陳書宣帝紀

僑置淮北郡縣詔

太建十一年三月丁未

淮北義人率戶口歸國者建其本屬舊名置立郡縣卽隸近州賦

給田宅喚訖一無所預

陳書宣帝紀

清又文案詔

太建十一年五月乙巳

昔軒轅命于風后力收放勛咨爾稷契朱武冕旒垂拱化致隆平爰逮漢列五曹周分六職設官理務各有攸司亦幾期刑措上世彌永竝賴羣才用康庶績朕日昃劬勞思弘治要而機事尙擁政道未凝夕惕于懷罔知攸濟方欲仗茲舟楫委成股肱徵名責實取監多士自今應尙書曹府寺內省監司文案悉付局參議分判其軍國興造徵發選序三獄等事前須詳斷然後啟聞凡諸辯決

務令清又約法守制較若畫一不得前後舛互自相矛盾致有柱

滯紆意舞文糾聽所知靡有攸攸

陳書宣帝紀

改重受財律詔

太建十一年五月甲寅

舊律已枉法受財爲坐雖重直法容賄其制甚輕豈不長彼貪殘生其舞弊事涉貨財盜不尤切今可改不枉法受財者科同正盜

陳書宣

帝紀

大赦詔 太建十一年十一月辛卯

畫冠弗犯革此澆風孥戮是蹤化于薄俗朕肅膺寶命迄將一紀思經邦濟治憂國愛民日仄劬勞夜分輟寢而還滔反杜其道靡階雍熙盛美莫云能致遂乃鞠訊之牒盈于聽覽春飲之人煩于牢狴周成刑措漢文斷獄杼軸空勞邈焉既遠加弓張爾醜徒軼我彭汴淮汝氓庶企踵王略治兵誓旅義存拯救飛芻挽粟征賦頗煩暑雨祁寒靈忘咨怨兼徧度乖舛次舍違方若曰之誠責歸

元首愧心斯積馭朽非懼卽建子令月微陽初動應此嘉辰宜播
寬澤可大赦天下

陳書宣
帝紀

尙儉詔

太建十一年十二月己巳

昔堯舜在上茅屋土階湯禹爲君藜杖韋帶至如甲帳絳絡華燵
璧璫未能雍熙徒聞侈欲朕企仰前聖思求訟平正道多違僥風
又靡至今貴里豪家金鋪玉鳥貧居陋巷餽食牛衣稱物平施何
其遼遠燿烽未息役賦兼勞文吏姦貪妄動科格重召旗亭關市
稅斂繁多不廣都內之饒非供水衡之費逼過商賈營謀私蓄竝
懷眾弊宜事改張弗弘王道安拯民蠹今可宣敕主衣尙方諸堂
署等自非軍國資須不得繕造眾物後宮僚列若有游長掖庭啟
奏卽皆量遣太子祕戲非會禮經樂府倡優不合雅正竝可刪改
市估津稅軍令國章更須詳定唯務平允別觀離宮郊開野外非
恆饗宴勿復脩治并敕内外文武車馬宅舍皆循儉約勿尙奢華

違我嚴規抑有刑憲所由具爲條格標榜宣示令喻朕心焉陳書宣帝紀

丹陽等十郡田稅原半詔太建十二年十一月己丑

朕君臨四海日旰劬勞思弘至治未臻斯道而兵車驟出軍費尤煩芻漕控引不能徵賦夏中亢旱傷農畿內爲甚民失所資歲取無託此則刑政未理陰陽舛度黎元阻饑君敦與足靖言興念余責在躬宜布惠澤溥沾氓庶其丹陽吳興晉陵建興義興東海信義陳畱江陵等十郡并謝署卽年田稅祿秩並各原半其丁租半申至來歲秋登陳書宣帝紀

遺詔太建十四年正月

朕爰自遭疾曾未浹旬醫藥不瘳使屬大漸終始定分夫復奚言但君臨寰宇十有四載誠則雖休勿休日慎一日知宗廟之負重識王業之艱難而邊鄙多虞生民未乂方欲蕩清四海包吞八荒

有志莫從。遺恨幽壤。皇太子叔寶繼體正嫡。年業韶茂。纂統洪基。社稷有主。羣公卿士。文武內外。俱罄心力。同竭股肱。送往事居。盡忠誠之節。當官奉職。引翼亮之功。務在叶和。無違朕意。凡厥終制。事從省約。金銀之飾。不須入壙。明器之具。皆令用瓦。唯使儉而合禮。勿得奢而乖度。日易月既。既有通規。公除之制。悉依舊制。在位百司。三日一臨。四方州鎮。五等諸侯。各守所職。並停奔赴。陳書宣帝紀

敕禁海際捕漁泥業

智禪師請禁海際捕漁泥業。此江苦無鳥賊珍味。宜依所請。永為

福地。

國清百錄

敕釋靖高等供給

至人爲法。已身許道。法師等善明治亂。歸寄有敘。可謂懷道正士。深可嘉之。宜于都郭大寺安置。所司供給。務令周洽。續高僧傳

敕北伐

今歲出師薄伐邊服所獲梁土則江淮二百許城東西五千餘里

然龜腹長文號千里也遠驗明言宛同符契

續高僧傳

敕畱釋智顓不許入天台

太建七年四月

京師三藏雖弘皆一途偏顯兼之者寡朕聞耳官濟濟深用慰懷

宜停訓物豈遑獨善一二曹義達口具得朕意也

釋藏起字一號國清百錄一

敕給釋智顓

太建九年二月

智顓禪師佛法雄傑時匠所宗訓兼道俗國之望也宜割始豐縣

諷旨充眾費蠲兩戶民用供薪水主者施行

同上又見續字二號續高僧傳十七

敕給修禪寺名

太建十年五月

具左僕射徐陵啟智顓禪師創立天台宴坐名嶽宜號修禪寺也

同上

與邊將書

盧潛猶在壽陽聞其何當還北此虜不死方爲國患卿宜深備之

北齊書
盧潛傳

從釋智顗受法文

仰惟化導無方隨機濟物衛護國土汲引天人照燭光輝託迹師友比丘入夢符契之像久彰和上來儀高座之德斯炳是日翹心十地渴仰四依大小二乘內外兩教尊師重道由來尚矣伏希俯提所謂世世結緣遂其本願日日增長今奉請爲菩薩戒師續高僧傳

勝天王般若懺文

菩薩戒弟子皇帝稽首十方諸佛無量尊法一切賢聖自鶴林滅迹驚嶺凝神瓶寫總持遺文不墜傳燈流布法輪踰廣方軌宏宣既昭著于西域分鑠顯說亦漸移于東土而周朝徵應止見夜明漢帝感通不過宵夢香象所載虎視寂而未聞龍宮所藏麟閣闐其無取山海爲隔傳授蓋微華夷不同翻譯何幾天王所問止得經名金剛之經緣見一品歷魏晉而未備經宋齊而恆闕我皇帝

承家建國、光前絕後、道格天地、通被幽微、大啟慈悲、廣開智慧、施造化、曰仁壽、濟蒼生于解脫、異世界而承風、殊刹土而響應、真人開出、法寶傳通、粵曰天嘉六年、外國王子月婆首、那來遊匡嶺、慧解深妙、靡測聖凡、奉持勝天王般若經一部、于彼翻譯、表獻京師、某校彼前名、冥合符契、總三乘之通教、貫六度之淵海、如開暗室、日照優曇、十方眾生、若貧人之獲寶、四部弟子、等力士之得珠、金牒寶印、始茲辰而一啟、智慧實法、泊爾時而方具、故知如來咐囑、必俟仁王、般若興隆、期于聖運、弟子纂承、洪緒思宏大業、願此法門、遍諸幽顯、今謹于某處、建如干僧、如干日、勝天王般若懺、見前大眾、至心敬禮、本師釋迦如來、禮般若波羅蜜、禮勝天王、願一切眾生、勤求般若、不避寒暑、如薩陀波崙、不愛身命、如精進力菩薩、得般若之性相、與般若而相應、攝諸萬有、住安隱地、含靈有識、悉獲歸依、稽首敬禮、常住三寶、

廣宏明集二十八下

賜進士出身一品銜廣東等處提刑按察使司按察使兼管驛傳事務黃岡王毓藻校刊

全陳文卷三終